

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – prečišćeni tekst ("Službeni glasnik BiH", broj 63/16), Državna regulatorna komisija za električnu energiju, na sjednici održanoj 13. marta 2018. godine, donijela je

ODLUKU

O IZDAVANJU PRIVREMENE LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Izdaje se privremena licenca za obavljanje djelatnosti međunarodne trgovine električnom energijom podnosiocu zahtjeva "Vitol Adriatik" d.o.o. Sarajevo.
2. Licenca iz tačke 1. ove odluke izdaje se za period od 24. marta 2018. godine do 23. marta 2020. godine i koristi se u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16).
3. Ova odluka stupa na snagu danom donošenja, a dispozitiv odluke bit će objavljen u "Službenom glasniku BiH" i službenim glasilima entiteta.

Obrazloženje

Društvo "Vitol Adriatik" d.o.o. Sarajevo (u daljem tekstu: podnosilac zahtjeva) vlasnik je privremene licence za obavljanje djelatnosti međunarodne trgovine električnom energijom, upisane u Registar licenci kod ove Komisije pod registracijskim brojem: 05-28-12-357-18/15 od 24. marta 2016. godine, čije trajanje ističe 23. marta 2018. godine.

Shodno pravu da koristi mogućnost obnove licence i ispunjavajući obavezu iz člana 48. Pravilnika o licencama – prečišćeni tekst ("Službeni glasnik BiH", broj 63/16) da najkasnije 120 dana prije isteka važnosti posjedujuće licence, izrazi svoju namjeru da djelatnost međunarodne trgovine električnom energijom nastavi i dalje obavljati, vlasnik licence je podnio zahtjev za izdavanje nove licence koji je zaprimljen pod brojem: 05-28-12-400-1/17 od 24. novembra 2017. godine. O podnijetom zahtjevu odlučuje se u skladu sa pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u BiH ("Službeni glasnik BiH", br. 7/02, 13/03, 76/09 i 1/11).

Zahtjev je podniet blagovremeno, na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su omogućili DERK-u da razumije, razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj: 05-28-12-400-3/17 od 11. decembra 2017. godine.

Po pregledu i provjeri svih formalnih elemenata zahtjeva, DERK je najprije 15. decembra 2017. godine objavio u dnevnim novinama i na svojoj internet stranici kratku obavijest za javnost, sumirajući zahtjev za licencu i odredio rok do 22. decembra 2017. godine za dostavljanje komentara javnosti na podnijeti zahtjev za izdavanje licence.

DERK je konstatirao da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

Podnosilac zahtjeva formalnopravno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom. Međutim, prilikom donošenja odluke o obnavljanju licence, a naročito o njenom trajanju, DERK dužnu pažnju posvećuje evaluaciji rezultata nadzora svih aspekata poslovanja u

prethodnom periodu. Vršeci nadzor poštivanja uvjeta i kriterija za obavljanje djelatnosti međunarodne trgovine električnom energijom tokom trajanja prethodne licence, uočeni su elementi koji su indikator DERK-u da finansijski položaj podnosioca zahtjeva bude predmetom permanentne pažnje. Ovu obavezu dodatno nameće i činjenica da podnosilac zahtjeva tokom prethodne godine nije obavljao licenciranu djelatnost. Pored navedenog, elementi uočeni vršenjem nadzora iziskuju i kontinuirano procijenjivanje postojanja osiguranih resursa i organiziranih uvjeta za obavljanje odnosne djelatnosti.

Naprijed izneseni rezultati nadzora svih aspekata usklađenosti dosadašnjeg djelovanja podnosioca zahtjeva sa uvjetima i kriterijima za obavljanje djelatnosti međunarodne trgovine električnom energijom, dali su dovoljno osnova da DERK, na osnovu člana 5. stav 4. Pravilnika o licencama, pristupi obnovi privremene licence, odnosno pripremi nacrt Odluke shodno kojoj bi ista ponovno važila dvije godine i koja se koristi u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom.

Ovaj dokument je od 19. januara 2018. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 24. januara 2018. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako podnosilac zahtjeva ni u posljednjoj prilici do 5. februara 2018. godine, po podnesku DERK-a broj: 05-28-12-400-14/17 od 29. januara 2018. godine, nije isticao neslaganje sa bilo kojom odredbom pripremljene odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Na osnovu svega naprijed izloženog, te respektirajući i dokaz da je podnosilac zahtjeva vlasnik dozvole Regulatorne komisije za energiju u Federaciji BiH za obavljanje djelatnosti snabdijevanja električnom energijom drugog reda na teritoriji Bosne i Hercegovine koja važi do 14. marta 2023. godine, DERK je odlučio kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema ove odluke.

Broj: 05-28-12-400-17/17

13. marta 2018. godine

Tuzla

Predsjedavajući Komisije

Nikola Pejić